

Zira, 9j.



suechet äs nöiis Daheime mit Freigang

Liebi Tierfründe

Hoi, ig bi d'Zira, uugfähr 9jährig, vo Bruef Charakterchatz (derzue schpätr) u uf dr Suechi nach eme nöie Daheime. Villiicht bi Dir? Suechsch Du es Büseli? Warum IG sueche? Mini Bsitzr müesse zügler u chönne mi nid mitnäh, wiu heisse, sy chönnte scho, nur hätt ig denn chei Freigang meh. Das isch nüt für mi, ohni Freigang geit gar nid. Drum!

Ig bi wie gseit 9jährig, kaschtriert, gimpft, chippet, gsung u schtuberein. Auso ig mache mis Gschäftli immr dusse, abr ig chenne's Chischtli vo fröchener u weiss, wofür es guet isch (we ma nid usse cha). Bi mim Mönsch bin ig sähr aahänglich. Mit ihm schmüesele ig gärn (denn, wenn ig wott). U vo dem lahn ig mi ou gärn schtriichele (denn, wenn ig wott). Abr nid am Füdli, dört geits gar nid. A Chopf u Haus, das lieb ig. U ummetrage geit ou nid, ig wiu min eigene Herr sy. Abr we Du es bitzeli Chatzeerfahrig hesch, denn chasch Du mi ou läse, denn merksch, wenn ig gnue ha u nüm wott. Soviu zum Thema «Charakterchatz u Freigeischtli». Ig bi ou scho ziemlich nöigiirig. We Du mi tuesch bsueche, denn chomm ig bschtimmt füre u luege, wer Du bisch u wie Du bisch. D'Nöigiirdi plagt mi haut doch immr. Ig chenne u bruuche min Freigang durchs Chatzetörli, im Garte u ire 30er Zone fühl ig mi am Wouschte. Ig muess inne u usse, denn, wenn ig das wott. Iigwönigsziit dinne bliibe? Ig weiss es, abr ig weiss nid, wie lang ig das uushaute wärd. Wiu: Du gloubsch ja nid, was dusse aues so geit. Schpannend, sag ig Dir! Abr ig probier's denn, verschproche. Ching, Hung u Chatz wott ig nid daheime, schtresse mi au. Ig u Du u sunsch niemer!

Ig sueche es liebevoes Daheime bi erfahreni Chatzefründe, bi dene ig eifach Zira dörfti sy. Di wo mi nehme so, wien ig bi u ticke. Wohnsch Du verkehrtsarm? I ere schpannende Umgäbig? U liebsch Du Chatze, die wüsse, was sy wöue? U was nid? Auso «ächti» Chatze? Das wär's! Denn müesst mir üs unbedingt lehre chenne. Ah ja, ig wohne derziit noch z'Bern/BE, zügler abr gärn zu Dir, wo ou immr Du wohnsch. Mäud di doch bitte ganz gly bi dr Sonja Ball. Sie het sich mir agno u suechet für mi das nöie Plätzli.

Dini Zira



Katze sucht Mensch - Mensch sucht Katze

Sonja Ball

Tel.Nr. 079 333 45 62 (Mo-Fr 18-20h)

kontakt@katze-sucht-mensch.ch